

# Gausa Iqet Gvaq Cieng Van

## 小小沙糕年味甜

□ Maknam comz hoiz



▲ Vunzlai nyaengq guh gausa gvaq cieng. Gvangjsih Yinz



▲ Gausa Ningzmingz.  
Ningzmingz Caisen



▲ Gausa Yangzmeij.  
Nanzningz Yinz



▲ Gausa Lungzcouh.



▲ Gwnzhaw Sangswh miz gausa baij gai.



▲ Gwnzhaw gai miz liuh guh gausa.

henj、duhheu daengj. Lungzcouh、Ningzmingz daengj dieg guh gausa ndaej raen baenz caengz mingzyienj, lumjbaenz gausa lwgraz dwg song caengz mbahaeux gap caengz lwgraz youq cungqgyang. Saek hau gap saekhenj roxnaeuz gap saekndaem, baenz caengz baenz caengz, ndei yawj raixcaix. Gij gausa Yangzmeij faen caengz couh mbouj baenzlai mingzyienj.

Doiq vunz Yangzmeij ma gangj, gausa caeuq haeuxsei doxdoengz, mwh gvaq cieng, ranzranz hohhoh cungj aeu guh daeuj gwn. Yangz Vwnzgaij dwg bouxciepcienz gij dinfwngz guh gausa Yangzmeij aen hanghmoeg swcigih gaep feihyiz neix. Ndaw cin haujlai bouqdiemq cungj daeuj laeng aen diengzhong de bued ma gai. De daj iq couh yawj bouxlaux ndawranz guh gausa, da raen rwz dingq, nanz le caemh sugseg baenzlawz guh gausa, yaek dawz gijmaz haeujsim. Deq de majhung, caiq daj ndawfwngz daxboh ciep aeu diuzrap hai diengzhong gausa.

Yaek guh'ok cungj gausa mbouj yeq、mbouj nem heuj, cawzok aeu genj liuh ndei, lij aeu rox cienq dangz、boiq liuh dem. Haeuxcid lwgraz (roxnaeuz duhheu、duhhenj) cimq raemx、langh raemx, aeu feiz iq menhmenh ceuj cug. Ndaej le couh muh baenz mba, daehbaengz coux dwk cuengq aen singhiz ndeu (seizhah cuengq haj roek ngoenz, seizdoeng cuengq song sam ngoenz), hawj mba bienq cumx, aeu bae guh gausa, gwn hwnjdaej mbouj nyan baenzlai. Doeklaeng couh hainduj cienq dangz, begdangz gyaraemx, menhmenh cienq baenz dangzliu, aeu ndau deih, deq dangzliu ndau hwnj raen baenz ndik yaek ok dangzsei bae couh daek hwnj. Cienq dangz yawj hwnjdaej

lumjbaenz mbouj hoj geijlai, hoeng, yaek cienqok gij dangzliu ndei aeu baengh gingniemh, cienq mbouj gaeuq roxnaeuz cienq gvaqloengz ne, aeu bae guh gau cungj guh mbouj baenz. Deq dangzliu langh ndaej haemq caep, doq raix haeuj mbahaeux bae, dwk youz、mbalwgraz roxnaeuz mbaduh doxgyaux. Geijlai mba gyaux geijlai dangz aeu boiq ndei, mbouj miz gausa couh mbouj diemz roxnaeuz diemzkw lai. Gyaux yinzfwd le couh coq roengz vunq bae, aeu gaiq loekfaex cienmonz ndeu nienjnet, caiq aeu cax gat baenz gaiq baenz gaiq raezseiqfueng, hoemj youq gwnz dak, cuengq haeuj aen gvih cienmonz bae, hawj mbahaeux caeuq dangz ndaej doxnem. Seizdoeng aiq cuengq song diemjung, fwngz daem dawz gij de mbouj heih sanq couh ndaej dawzok duk hwnj. Cungj gausa vunz gag guh neix gwn hwnjdaej saeqnaeh mbouj nem conghhoz、mbouj se, cuengq nanz lij unqnemnem、baenz gaiq mbouj sanq.

Gaxgonq, gausa dwg gvaq cieng aeu bae buiz bouxsaenz caeuq cojgoeng, doeklaeng caiq bienqbaenz gijgwn vunzlai dawz bae cunz caencik baengzyoux ndeu. “糕” caeuq “高” doeg hwnjdaej doxdoengz, soengq gau hawj vunz couhdwg muengh de ndwnngoengz engq vuenyungz, ngoenz ndei gvaq ngoenz. Aenvih gausa daibyauij aeu maz ndaej maz, ndigah vunzlai senj ranzmoq、haqsau aebawx daengj caemh guh gausa ma gwn.

Gwn gaiq gausa youh unq youh diemz ndeu, cienq couh gyawj lo. Boux youq baihrog mbouj ndaej ma, gwn gaemz gausa, lumjbaenz lij youq ranzmbanj, mbouj caengz lizbae.